

paati. Kaore kau he Ngawene Pango, he Hamuera Pango ranei, i roto i taua piihi. Mo te patai tuaiwa. Taku whakahoki: ko Te Au ra raua ko tona teina ko Te Eketu Ngahuruhuru e hapai nei i te Hahi o to raua koroua, me to raua papa o Pererika Ngahuruhuru. Titiro iana ko te Whare-karakia tawhito kua hikitia atu ki te taha ki te moana. Na Te Eketu Ngahuruhuru i whakaae kia tu ki reira, hei painga mo te Hahi o tona koroua o Ngahuruhuru Pango.

Kia mohio mai te kooti whakatau i te kechi mo nga Pango nei, ki taku titiro me whakatau tenei kechi ki a Ngahuruhuru Pango, i runga ano i te marama o nga korero me nga ripoata o te taha ki a ia. Ko te taha ki a Ngawene Pango kei te kimi paura, a kaore e kitea he paura pai, ara paua kaha. Ko nga paura kua kitea e te tangata nei e Akapita, he paura whiunga na nga tamariki ki te wai, ana ka hau-maku, kaore e paku. Kia kaha ra e koro ki te kimi paura tika kia pai ai hoki te paku.

—*Na Te Rire Whititera.*

Ohinemutu.

Ki te Etita.

TENA KOE. Tena kua kite iho i nga patai a te hoa, e patai nei kia mohio ai, he aha tenei, pehea tera, nawai tenei? E Toa Hamuera, toko rongo ki oku kuia, na Pango i hari mai a Te Wiremu, ki te riu o Rotorua. Penei hoki te rongo o etahi tangata tokomaha o Rotorua nei. Ko koe anake me ou hoa ruarua nei, kei te kuare ki ta te tokomaha i mohio ai o tatou e noho nei i Ohinemutu.

Kaati, kua kite iho i o patai. He aha koe te patai tonu mai ai ki a matou i a tatou e noho tahi nei i Ohinemutu, i kawea ai o patai hai matakitaki ma rau rangatira ma i tena marae i tena marae, i kitea nuitia ai to taua nei kuare. Kua kitea iho i o patai, kaore ano koe ki a koeke.

Patai 2.—Na Pango a Ngahuruhuru. Koina i karangatia ai Ngahuruhuru Pango.

Patai 3.—Kaore koe i rongo i a au e korero ana i ta tatau hui. i haere a Pango i runga i te kaupuke o te Korekore, ki te kimi i tana tamahine i a Mangamangaiatua i nga rohe o Ngapuhi. E rere ke ana te korero atu a to kai-titiro i nga korero o roto o nga panui, me tana tuhituhi i to hiahia penei, pera. Ka raru te kapo.

Patai 4.—Ae, i pena taku korero. I hahua mai a Mangamangaiatua i Oihi e Pango, me taku waiata i te waiata a Pango.

Patai 5.—Kai Paihia a Ngapuhi me Ngati Whakaeu, mai i mua tae mai ki enei ra.

Patai 9.—Ko Pererika Peneti, ko te mokopuna a Ngahuruhuru, te kai-hapai i te whakapono o te Hahi o Ingarangi, te owha a taua tupuna i hari mai ai. Ko wai ki tou rongo? Heoi ano

—*Na Tutanekai Pokaihou*